



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliorvm Omnivm Generalivm Et Provincialivm Collectio Regia

Ab anno DCCCLXXII. ad annum DCCCCIX.

Parisiis, 1644

Epistola CXXVI. Ioannis Papae VIII. Ad Anspertvm Archiepiscopvm
Mediolanensem. Increpat eum, quod sibi auxilium non tulerit; & iam tertio
monet vt sibi Papiam certa die cum suis suffraganeis occurrat.

urn:nbn:de:hbz:466:1-15967

quoniam dignum est, ut soli omnes adiutorium præbeant, qui solus pro cunctis desudare non cessat. Præsentem itaque huius latorem epistolæ, Agilmarum venerabilem episcopum, excellentiæ vestræ plurimum commendamus: quatenus idem, suaque ecclesia crescat augmento perfectionis, qui in omnibus opportunitatibus nostris nulli secundus extitit, & vobis fidelissimum in cunctis, quæ cognouerit, verissime comprobauimus. Inter hæc episcopos, quos serenitas vestra in nostrum iussit venire adiutorium scias præter Agilmarum nullum venisse. Quapropter regalis censura culminis vestri sua auctoritate compellat eos quantocius * hostiliter Romam venire, ut de cetero discant apostolico culmini & regali excellentiæ congruenter præbere obedientiam.

* fort.
synoda-
liter.

NOTA IACOBI SIRMONDI
SOCIETATIS IESV.

* *Agilmarum.*] Ex subscriptionibus Synodi Tricassinæ, atque ex præcepto Caroli Crassi anno DCCCXXCV. Aruernorum episcopum fuisse intelligimus.

EPISTOLA CXXVI.
IOANNIS PAPÆ VIII.

AD ANSPERTVM ARCHIEPISCOPVM
MEDIOLANENSEM.

Increpat eum, quod sibi auxilium non tulerit; & iam tertio monet ut sibi Papiam certa die cum suis suffraganeis occurrat.

Reuerendissimo & sanctissimo confratri Ansperto venerabili archiepiscopo Mediolanensi.

QVANTVM benigna fraternitas vestra sanctæ sedi apostolicæ concurrere, ac concordare debeat, prædecesor noster beatus Gelasius papa ad episcopos paruipendentes vexationem fratrum his verbis comminando scribit, dicens: Cur non compassi estis tantis fratribus vestris? Cur non adistis imperatorem? Cur non posuistis animam pro confratribus, quam præceptum habetis ponere pro grege vobis commisso? Cur non posuistis vos pro domo Israel murum, ut staretis in prælio in diem Domini? Quapropter tandem discussa negligentia ad pristinum vos refor-

mate certamen, fratribus auxilium concite ad ferendum. Hæc & horum similia vestram fraternitatem debuerant exempla prouocare, & nobis pro totius sanctæ Dei ecclesiæ statu laborantibus non tantum inuiti iam, sed etiam sponte concurrere debetis, ac debuistis. Sed iam, nunc post tertiam admonitionem nobis cum confratribus vestris, & coepiscopis studete Papiam hac quinta feria proxima adueniente occurrere, zelum Dei, quem pro vobis omnibus patior, atque dolorem audientes, vt quod deinceps Deus omnipotens communi vestro consilio decreuerit, facere valeamus. Nulla frater carissime animo vestro dubietas insideat, in mea fide, & in meo sacerdotio credite; nil contra vestram decentiam, atque honorem vobis aliquatenus opponetur; quia, quod non optamus, si hæc paruipendere tentaueritis, post tantam patientiam canonica eritis*.

EPISTOLA CXXVII.

IOANNIS PAPÆ VIII.

AD EVMDEM.

Narrat labores pro ecclesia susceptos, monet vt sibi cum omnibus episcopis suis Papiam occurrat.

Reuerendissimo & sanctissimo confratri Ansperto venerabili archiepiscopo Mediolanensi.

QUANTVM pro totius sanctæ Dei ecclesiæ statu, & pro cuncto grege dominico, pro quo omnipotens Deus proprio Filio suo non pepercit, sed pro nobis omnibus tradidit illum, & Ioannes apostolus exhortas nos ait: *Quoniam ille pro nobis animam suam posuit, & nos debemus pro fratribus animam ponere*, laborare, ac vigilare semper debemus, omnium vestrum luce clarius nouit pia fraternitas. Quapropter, quantum ex diuina gratia in nobis fuit, & est, ex quo nos superna miseratio suæ ecclesiæ præfecit, animæ nostræ nunquam pepercimus, nunquam dura pericula declinauimus; sed die noctuque, aestu & gelu exusti, ne quid captum a bestia aut dilaceratum Domino ostenderemus, marinos fluctus pertulimus pro omnium vestrum liberatione atque salute. in Franciam quoque venientes, & regum filios partim viua voce, partim epistolis atque legatis

1. Ioan. 3.

* f. desit
animad-
uersione
castigati,
vel ali-
quid ha-
iusmodi.